

بواسطه جناب زائر آقا سید مهدی قراباغی

تفلیس

احبای الهی علیهم بهاء الله الأبهی

هو الله

ای بندگان حضرت کبریا قفقاز فارسیجه کوه قافدر اسکی زمانده اهل عالمن اعتقادی اوزره جبل قاف سیمرغ الطافن یورد و یووه سیدر هر نه ایسه فال خیردر و او مرغ عظیمک سیرگاهی مشرق عزت اولدیغنی سویلرلرایدی بو سوزن حقیقتی شویله اوله ییلور که سیمرغ بر شخص جلیل ایمش لانه و آشیانه سی قفقاز اقلیمی ایمش و الطاف الهیه ایله غایت رزین و متین ایمش یعنی نقایص و رذائل نفوس بشریه دن محفوظ و مصون بر حصن حصین ایمش هر نه ایسه فال خیر ایده لم و سیر ایده لم تفلیسی نفیس ایده لم و هر وحشت زده بی انیس ایده لم شیروانی ایوان ایده لم گنججه بی گنج بی پایان ایده لم قفقازی دلبر طناز ایده لم و مبتلای حرمان اولانلری همدم و همراز ایده لم یعنی عموم خلق ایله خلُق رحمانی ایله معامله ایده لم و کافّه بشری راه نجات و نجاهه رهبر اوله لم عموم امم ایله کمال صدق و امانت و محبت و وفا ایله معاشرت ایده لم هر درده درمان اوله لم و هر یاره یه مرهم دل و جان اوله لم نوع انسانه مهربان اوله لم و علیکم التّحیّة و الثّناء ع ع

---

این سند از [کتابخانه مراجع بهائی](http://www.bahai.org/fa/legal) داندلود شده است. شما مجاز هستید از متن آن با توجه به مقررات مندرج در سایت [www.bahai.org/fa/legal](http://www.bahai.org/fa/legal) استفاده نمایید.

آخرین ویراستاری: ۲۹ اوت ۲۰۲۳، ساعت ۱۱:۰۰ قبل از ظهر